

*A dì 17 mazo.* Fo da poi disnar 0, per esser el di di la Sensa.

*A dì 18 mazo.* Fo pregadi. Et fo electo provedador a Faenza, in loco di sier Christofal Moro, qual à refudado, hessendo li in rezimento, sier Piero Marcello, fo savio a terra ferma, *quondam* sier Giacomo Antonio, el cavalier; fo sofo sier Domenego Contarini, fo podestà a Bergamo.

Fu posto, per li savij ai ordeni, che le zurme di le galie di Barbaria debano andar in galia e altri officiali sotto grandissime pene, *ut in parte*, qual fo publicata.

*A dì 19 mazo, sabado.* Fo da poi disnar pregadi. Et fu posto, per li consieri, atento molti savij dil consejo manchavano, per esser amallati, che *de presentì* siano electi 4 savij dil consejo, posendo esser tolti quelli sariano tolti sto zugno et intrano *de presentì*, 3 di qual siano ordinarij, et uno per mexi 3, in loco di sier Andrea Venier, intrà consier. E rimase sier Domenego Bollani, fo savio dil consejo, sier Alvixe Venier, fo consier, sier Antonio Trun, fo savio dil consejo; et per 3 mexi sier Tomà Mozenigo, el procurator, di 3 balote, da sier Marco Sanudo, fo savio dil consejo, e questo per esser amallato, et sier Luca Zen, procurator, sier Nicolò Michiel, procurator, sier Hironimo Zorzi, el cavalier.

Et perchè li consieri manchavano, per esser amallati, restò el consejo di X, per far nove provisione a questo effecto, e trovano parte, che si pol chiamar gran consejo con do solli consieri, perhò che li capi di 40 intrano in loco di consieri, a l'ombrar di le balote vien uno avogador o ver cao di X.

*Item*, fu preso mandar altre nave, *videlicet* la Donada e compagni, la Malipiera e quella di sier Tadio Contarini, a Cataro, con li modi et homeni, *ut in parte*.

Noto, vene uno nontio dil sanzacho de la Valona. Fo posto a la Zuecha in cha' Pixani a spexe di la Signoria nostra; et fo preso mandar a dito sanzacho uno secretario nostro.

È da saper, in questi zorni achadete a Lido, che, provandosi artillarie, Paulo da Canal provò le sue, e l'ultima volendo veder, par uno desse fuogo e li portò via la testa; sì che fo un gran caso e notabile, et cussì l'altro *etiam* morì.

*A dì 20 mazo.* Fo gran consejo. Fu fato consier di San Polo, in luogo di sier Marco Foscolo, à refudà per egritudine. Rimase sier Lorenzo di Prioli, fo cao dil consejo di X, *quondam* sier Piero, el cavalier, da sier Piero Capello, fo cao dil consejo di X, *quondam* sier Zuan, el procurator, el qual vene per seur-

tinio, e il Prioli per eletion, et subito introe. *Etiam* fo fato podestà a Padoa sier Alvixe da Molin, el consier, che vene dopio, da sier Marco Sanudo, fo savio grandò, di balote 42, et sier Andrea Minoto, el consier.

*A dì 21 mazo.* In colegio. Andoe domino Vincenzo di Naldo, con suo euxin, Dionisio di Naldo, el qual fo assa' acharezato, et fo commesso a li savij ad udirlo.

*A dì 22 mazo.* Fo pregadi. Fu posto, per li savij ai ordeni, do galie a Baruto et 3 in Alexandria, a partir a di . . avosto, con muda 25 zorni poi zonte; et non si partendo a quel tempo, habino per tutto novembrio la muda. *Item*, certo capitolo per li bazarioti, per il cargar di specie *etc.* Contradixè sier Lunardo Grimani, savio dil consejo, et messe certa so opinion; li rispose sier Lunardo Emo; poi parlò sier Hironimo Capello, ma di largo. Fo preso la parte dil Grimani.

*Item*, fu posto certa parte di quelli hanno tochato pro', et è di caxe vendute, e tajate le vendede, debino restituir. Et poi restò consejo di X con il colegio.

*A dì 23 mazo.* Fo, da poi disnar, consejo di X con zonta. Et si ave aviso di le galie di Barbaria, capetanio sier Andrea Mocenigo, qual erano zonte in Histria. *Item*, esser anegato uno fiol di sier Piero Balbi, per esser cargo il batello, a . . . . .

*A dì 24 mazo.* Fo da poi disnar pregadi. Et fo posto, per li savij ai ordeni, che cussì, comme le galie di viazi non haveano trovà patron, per esser stà dato la Romania bassa e alta per mità a dite do mude, 8<sup>o</sup> perhò sia preso, che sia dato a le galie di Baruto solamente; et fu preso.

*Item*, fu posto, per li savij ai ordeni prediti, che le lane restano in Fiandra possino venir con nave forestiere *etc.*, *ut in parte*. Contradixè sier Hironimo Capello; rispose sier Lunardo Emo; et fu preso di no.

*A dì 25 mazo.* Da matina in Rialto fo incantado le galie, *primo* di Alexandria, e li patroni fonno questi:

Sier Almorò Pixani, *quondam* sier Hironimo, per lire . . . .

Sier Ferigo Contarini, *quondam* sier Ambruoso, per lire . . . .

Sier Alvixe Trivixam, di sier Nicolò, el procurator, per lire . . . .